



RAKAN BAHASA BERAZAM UNTUK MENCAPAI VISI 'BUDAYA DIWARISI, BAHASA DILESTARI, IDENTITI SEJATI'

Sabtu, 13 April 2019 – Dalam Majlis Pelantikan Rakan Bahasa pagi tadi, seramai 302 orang pelajar Bahasa Melayu dari 150 buah sekolah telah dilantik sebagai Rakan Bahasa di Pusat Kebudayaan Cina Singapura (*Singapore Chinese Cultural Centre*). Acara tersebut dihadiri Tetamu Terhormat, Puan Rahayu Mahzam, Pengurus Jawatankuasa Bulan Bahasa, Ahli Majlis Bahasa Melayu Singapura, dan Ahli Parlimen untuk GRC Jurong.

“Saya galakkan semua ibu bapa untuk terus menggunakan bahasa Melayu bersama anak-anak anda, supaya kita dapat menyokong mereka untuk mengamalkan penggunaan bahasa ibunda kita. Terima kasih kepada guru-guru kerana mencalonkan pelajar-pelajar anda, dan terlibat dalam pembelajaran bahasa Melayu mereka. Usaha dan kerja keras anda bukan sesuatu yang sia-sia, kerana anda memupuk rasa cinta akan bahasa dan budaya Melayu,” kata Puan Rahayu dalam ucapan beliau.

Puan Rahayu mengucapkan tahniah kepada para pelajar dan menggalakkan mereka mencapai visi Rakan Bahasa - ‘Budaya Diwarisi, Bahasa Dilestari, Identiti Sejati’. Semua Rakan Bahasa juga digalakkan untuk mengekspresikan identiti mereka melalui warisan budaya dan bahasa Melayu.

Beliau juga menekankan kepentingan kedwibahasaan ketika mengumumkan pertandingan penterjemahan Rakan Bahasa yang akan diadakan untuk pertama kali. Beberapa inisiatif dan program yang telah dirancang untuk penyertaan semua Rakan Bahasa tahun ini. Inisiatif-inisiatif ini bertujuan untuk menggalakkan pelajar menghargai bahasa Melayu, dan membina keyakinan diri ketika menggunakan.

1. Penterjemah Pintar [BAHARU]

Disokong oleh Jawatankuasa Penterjemahan Nasional (NTC), pertandingan **Penterjemah Pintar** bertujuan untuk menekankan kerelevan dan kepentingan kedwibahasaan, dalam kehidupan harian Rakan Bahasa. Pertandingan ini akan diadakan pada 17 Mei 2019, di Sekolah Rendah Oasis, untuk pasukan-pasukan Rakan Bahasa dari sekolah rendah yang telah berdaftar.

2. Kembara Rakan Bahasa

Kembara Rakan Bahasa, kad aktiviti yang mencabar Rakan Bahasa untuk menyelesaikan tugas-tugas berbeza, untuk mengasah kemahiran dan minat dalam bahasa Melayu. Setiap peringkat sekolah berbeza (sekolah rendah, sekolah menengah dan institusi pengajian tinggi) akan menerima kad aktiviti khusus, yang mengandungi tugas-tugas berkaitan dengan kemahiran membaca, menulis, bertutur dan aktiviti-aktiviti yang menggalakkan pembelajaran bahasa Melayu.



Pertama kali dilancarkan 2018, kad tahun ini menampilkan tugas-tugasan baharu untuk Rakan Bahasa.

Sebagai tanda pencapaian, Rakan-rakan Bahasa yang menyelesaikan tugas-tugasan ini akan menerima lencana eksklusif.

3. Pertandingan NewsMaker

Pertandingan NewsMaker, anjuran bersama TeeVers, Majlis Bahasa Melayu Singapura dan Jawatankuasa Bulan Bahasa kembali untuk edisi kedua tahun ini. Sempena sambutan dwiabad, Rakan Bahasa akan dicabar untuk menerbitkan laporan berita menggunakan topik-topik berkaitan dengan tema ‘Singapuraku’.

Pertandingan ini akan diadakan pada 22 dan 23 Mei 2019 di Taman Warisan Melayu, bagi pasukan-pasukan yang telah berdaftar. Pemenang akan diumumkan pada bulan Jun dan akan menerima piala, pingat dan sijil.

4. Peranan sebagai Pemudah Cara dalam Majlis Pelancaran Bulan Bahasa

Rakan Bahasa juga akan berpeluang untuk mengasah dan mempraktikkan kemahiran bahasa dan penyampaian mereka semasa Majlis Pelancaran Bulan Bahasa, pada 7 September 2019, di Muzium Tamadun Asia (ACM). Mereka akan memainkan peranan sebagai pemudah cara, dan menghidupkan bahasa dan budaya Melayu untuk semua pengunjung.

Tambahan lagi, semua Rakan Bahasa digalakkan melibatkan diri mereka dalam program-program dan acara-acara yang akan diadakan sepanjang Bulan Bahasa, dari 17 Ogos hingga 13 Oktober 2019.

~~~

**Diembargo sehingga  
10 pagi, Sabtu, 13 April 2019**



**Untuk maklumat lanjut, sila hubungi:**

Cik Liyana Nasyita  
Penolong Pengurus  
Institusi Warisan  
Lembaga Warisan Negara  
DID: 6332 5493  
E-mel: [liyana\\_nasyita\\_shukarman@nhb.gov.sg](mailto:liyana_nasyita_shukarman@nhb.gov.sg)

**Mengenai Bulan Bahasa anjuran Majlis Bahasa Melayu Singapura**

Bulan Bahasa pertama kali dilancarkan pada tahun 1988 oleh Majlis Bahasa Melayu Singapura (MBMS) dan diadakan sekali setiap dua tahun. Sejak 2011, ia menjadi sambutan tahunan yang terus menarik minat, penyertaan dan sokongan masyarakat.

Sebagai inisiatif unggul MBMS, Bulan Bahasa menggalakkan masyarakat menghargai dan menggunakan bahasa Melayu di dalam kehidupan mereka dalam usaha melestarikan warisan masyarakat Melayu.

Untuk maklumat lanjut mengenai MBMS, dan Bulan Bahasa, sila lungsuri [mbms.sg](http://mbms.sg) dan [facebook.com/majlisbahasa](https://facebook.com/majlisbahasa).